

თბილისის  
კანო  
სარაჯიშვილის  
სახელობის  
სახელმწიფო  
კონსერვატორიის  
ტრადიციული  
მრავალხმიანობის  
საერთაშორისო  
ცენტრის  
ბიულეტენი

№ 11

ახალი ამბები

გამოხმაურება ახალ წიგნზე  
ქართული მრავალხმიანობის  
შესახებ

უცხოური მრავალხმიანობა.  
პოლო ვალეჟო.  
ვაგოგოს ტომის მუსიკა

უცხოური ფოლკლორული  
ანსამბლი.  
„სპარტიმუ“

ქართული ტრადიციული  
მუსიკის ანსამბლი.  
„იალონი“

ქართული სიმღერის  
უცხოელი შემსრულებლები.  
„დოლური“

ქართული სიმღერის  
მოამაგეები.  
ძუბუ ლოლუა

ძველი პრესის ფურცლებზე.  
გრიგოლ ჩხიკვაძე.  
ქართული საგუნდო  
კულტურის ისტორია

ქართული მეცნიერებისა და  
კულტურის კერები.  
თბილისის არნოლდ  
ჩიქობავას სახელობის  
ენათმეცნიერების ინსტიტუტი

ერთი სიმღერის ისტორია  
„კირიალესა“

## ახალი ამბები

### საქართველოს ეთნომუსიკალური ცხოვრება (ივლისი-დეკემბერი, 2011)

#### ფესტივალები და კონფერენციები

**5-6.10.2011** – ქ. ბათუმში ჩატარდა ქაზიმ ქოიონჯუს სახელობის ლაზური სიმღერის ფესტივალი, რომელშიც ქართული ანსამბლებიდან მონაწილეობა მიიღო ანსამბლმა „თუთარჩელაშ“.

**17-19.10.2011** – ჩატარდა ხობის V საერთაშორისო ფესტივალი და სამეცნიერო კონფერენცია „სიმღერა სამეგრელოზე“.

**15-17.11.2011** – ბათუმში ჩატარდა საერო და სასულიერო მუსიკის VI საერთაშორისო ფესტივალი და კონფერენცია.

#### კომპაქტ-დისკები

**09.10.2011** – ანსამბლმა „მთიებმა“ ჩაწერა ახალი კომპაქტ-დისკი.

**2011 წლის სექტემბერი** – ანსამბლმა „რუსთავემა“ ჩაწერა ახალი კომპაქტ-დისკი

**12.11.2011** – ფოლკლორის სახელმწიფო ცენტრის გალერეაში გაიმართა მგალობელ გოგონათა გუნდი „იალონის“ რიგით მეორე კომპაქტ-დისკის პრეზენტაცია

#### ქანკედიციები

**2011 წლის ნოემბერი** – ბათუმის ხელოვნების სასწავლო უნივერსიტეტის მუსიკის ფაკულტეტის მაგისტრანტი გიორგი კრავეიშვილი ფილოლოგ მართა ტარტარაშვილთან ერთად იმყოფებოდა მოკლევადიან ფოლკლორულ ექსპედიციაში კახის რაიონის სოფლებში (საინგილო).

**2011 წლის ნოემბერი** – განოხაზვილის სახელობის თბილისის სახელმწიფო კონსერვატორიის ქართული ხალხური მუსიკალური შემოქმედების მიმართულების სტუდენტები თ. კაპანაძის ხელმძღვანელობით იმყოფებოდნენ ფოკლორულ ექსპედიციაში რაჭაში, ონის რაიონის სოფლებში.

#### გასტროლები

**15-27.07.2011** – ანსამბლი „ბასიანი“ იმყოფებოდა საგასტროლოდ საფრანგეთში.

**24.09.2011** – ანსამბლმა „მთიებმა“ მამა გორგი შარაშენიძესთან ერთად სტოკოლმის ერთ-ერთ მართლმადიდებლურ ტაძარში მონაწილეობა მიიღო საეკლესიო ღვთისმსახურებაში.

**25.09.2011** – ანსამბლმა „მთიებმა“ სტოკოლმის მსოფლიო მუსიკისა და ფოლკლორის ცენტრ „სტალენში“ სოლო კონცერტი გამართა.

**15-25.10.2011** – ანსამბლი „თუთარჩელა“ იმყოფებოდა საგასტროლოდ გერმანიის ქალაქებში: ლიცხენგურგში, ჰანოვერში, ჰამბურგში, ბევერნიცენტრში, სადაც გამართა როგორც სოლო, ისე ერთობლივი კონცერტები გერმანელ ქალთა გუნდთან “Vemmes vocales”- ერთად და ჩატარა მასტერკლასები ქ. ლიუნებურგში.

**16-19.10.2011** – ანსამბლი „დიდგორი“ იმყოფებოდა საგასტროლოდ კორსიკაზე, ქ. აიაჩოში.

**26.10.2011-23.11.2011** – ანსამბლი „შავნაბადა“ იმყოფებოდა საგასტროლოდ ინგლისის სხვადასხვა ქალაქებში, სადაც სოლო კონცერტების პარალელურად მასტერკლასებიც ჩატარა.

**4-28.11.2011** – ანსამბლი „სახიობა“ იმყოფებოდა დიდ ბრიტანეთში, სადაც გამართა 14 კონცერტი.

**2-17.11.2011** – ანსამბლი „რუსთავი“ იმყოფებოდა საგასტროლოდ ნორვეგიის, პოლონეთისა და იტალიის სხვადასხვა ქალაქებში.

**19-30.11.2011** – ანსამბლი „რუსთავი“ იმყოფებოდა საგასტროლოდ ეგვიპტში

#### კონცერტები და საღამოები

**6.10.2011** – ჭ. კახიძის სახელობის კლასიკური მუსიკის ფესტივალის „შემოდგომის თბილისის“ ფარგლებში გაიმართა ქართული ფოლკლორის საღამო, რომელიც მიეღდვნა ანსამბლ „შვიდკაცას“ 55 წლის იუბილეს. კონცერტში მონაწილეობდნენ ანსამბლები: „მართვე“, „ბიჭები“, „მძლევარი“, „რუსთავი“, „ბასიანი“, „იმერეთი“, „ბათუმი“, „შალვა

ჩემო“, სამების საკათედრო ტაძრის საპატ-  
რიარქო გუნდი, ქალთა ინსტრუმენტული  
ანსამბლი „გორდელა“, ქალთა ფოლკ-  
ლორული ანსამბლი „ქალგულო“.

**15.10.2011** – ანსამბლმა „რუსთავმა“ გამართა  
სოლო კონცერტი ქ. რუსთავში „რუსთავის“  
დღესასწაულთან დაკავშირებით.

**28.10.2011** – ანსამბლმა „რუსთავმა“  
გამართა სოლო კონცერტი ქ. ასპინძაში  
„შოთაობის“ დღესასწაულთან დაკავშირებით.

**1.11.2011** – მ. ბერძენიშვილის სახელობის  
კულტურის ცენტრ „მუზაში“ ა. ერქო-  
მაიშვილის ინიციატივით ანსამბლმა  
„ბასიანმა“ და ტრიომ „შალვა ჩემო“ ერთობ-  
ლივი კონცერტი გამართეს.

**3.11.2011** – ვანო სარაჯიშვილის სახელობის  
თბილისის სახელმწიფო კონსერვატორიის  
მცირე დარბაზში გაიმართა ანსამბლ „ოუ-  
თარჩელას“ სამი თაობის კონცერტი „მსოფლ-  
ის ხალხთა ფოლკლორი“.

**9.12.2011** – ანსამბლმა „რუსთავმა“ გამართა  
სოლო კონცერტი თბილისის დიდ საკონცერ-  
ტო დარბაზში.

**11.12.2011** – ქ. ბათუმში გაიმართა აჭარის  
სახელმწიფო ანსამბლ „ბათუმის“ საიუბილეო  
საღამო და კონცერტი.

**12.12.2011** – რუსთაველის თეატრის მცირე  
დარბაზში გაიმართა ქალთა ფოლკლორული  
ანსამბლ „კერიას“ პირველი სოლო კონცერტი.

**22.12.2011** – ვანო სარაჯიშვილის  
სახელობის თბილისის სახელმწიფო  
კონსერვატორიაში გაიმართა ა. ერქომაი-  
შვილის დაბადებიდან 70 წლისთავისადმი მი-  
ძღვნილი საიუბილეო კონცერტი, რომელშიც  
მონაწილეობდნენ ანსამბლები: „ანჩისხატის  
ტაძრის გუნდი“, „ბასიანი“, „მთიები“, „შავ-  
ნაბადა“, „ბალაგარი“, „თბილისი“, „იმერი“,  
„დიდგორი“, „ალილო“, ტრიო „შალვა ჩემო“,  
სამების საკათედრო ტაძრის საპატრიარქო  
გუნდი.

## ახალი გამოცემები

ვ. გოგობიშვილი. ქართული ხალხური  
მუსიკის თეორიული საკითხები.  
საქართველოს მეცნიერებათა ეროვნული  
აკადემია, თბილისის ვანო სარაჯიშვილის  
სახ. სახელმწიფო კონსერვატორია.

საქველმოქმედო ფონდმა „ხობმა“ გამოსცა:

ვ. გარაეანიძე. ქართული მუსიკალური  
დიალექტები და მათი ურთიერთობიმართება  
(გამომცემლობა „საქართველოს მაცნე“, თბ.,  
2011)

ქართული ხალხური მუსიკის უცხოელი  
დაკვლევრები და შემკრებლები (შემდგენელი ნ.  
ნაკაშიძე, გამომცემლობა „უსტარი“, თბ., 2011)

ნ. კალანდაძე, მ. კვიჭინაძე. ტრადიციული  
მუსიკა ქართულ-აფხაზურ დიალოგში (გამომ-  
ცემლობა „ტრიასი“, თბ., 2011)

ა. ერქომაიშვილი. გზები, ადამიანები,  
სიმღერები... (გამომცემლობა „უსტარი“, თბ.,  
2011)

გ. სიხარულიძე. „გორდელა“ (მოგონებები).


კომპაქტ-დისკი „ანზორ ერქომქიშვილი 70“,  
რომელშიც შესულია 35 სიმღერა

ა. ერქომაიშვილის მონაწილეობით.

## მოამზადა მაკა ხარძიანმა

# გამოხაურება ახალ წიგნზე ქართული მრავალხმიანობის შესახებ

## „ექო საქართველოდან“



ნოვა საიენს პაბლიშერს მა (Nova Science Publishers), გამოსცა წიგნი „ექო საქართველოდან: ჩვიდები არგუმენტი ქართული პოლიფონიის შესახებ“. იგი თბილისის სახელმწიფო კონსერვატორიის ტრადიციული მრავალხმიანობის კვლევის საერთაშორისო ცენტრმა მოამზადა.

ეს არის პირველი ინგლისურენოვანი კრებული, რომელიც მრავალხმივად აშექებს ქართულ პოლიფონიას. მისი მიზანია საერთაშორისო საზოგადოებას მიაწოდოს მეცნიერული ცოდნა მოვლენაზე, რომელსაც უძანასკნელ ხანს მსოფლიო საკმაოდ კარგად გაეცნო ქართული ფოლკლორული ანსამბლების საგასტროლო ტურნეების წყალობით. უცხოელთა გაზრდილ ინტერესზე მეტყველებს ქართული მრავალხმიანობის შემსრულებელი ანსამბლების მომრავლებაც სხვადასხვა ქვეყანაშიც. ალბათ, სწორედ ამით უნდა იისხნას ამერიკული სამეცნიერო გამომცემობის დაინტერესებაც ამ თემით.

თავიდანვე უნდა ითქვას, რომ შთამბეჭდავია ამ სქელყდიანი წიგნის გაფორმება, რომელშიც კარგადაა მინიშნებული ქართული კულტურის არქაულობაც და მისი განუმეორებელი ელფერიც. კრებული შესანიშნავადაა შედგენილი, მასში აგრორების საკმაოდ მრავალფეროვანი სპექტრია წარმოდგენილი. ჩემი აზრით, მის ღირებულებას ისიც ზრდის, რომ ქართული მრავალხმიანობის წარმოშობისა და განვითარების, მისი ფორმების მრავალფეროვნებისა და უნიკალობის შესახებ

მსჯელობენ არა მარტო ქართველი, არამედ უცხოელი მეცნიერებიც. ამ თვალსაზრისით აღსანიშნავია ზიგფრიდ ნადევლის წიგნის „ქართული სიმღერა“ ფრაგმენტები, რომლითაც ისხნება კრებული. გერმანელი მკვლევარი პირველი იყო, ვინც დაინტერესდა ქართული მრავალხმიანობის ფენომენით და მიუძღვნა მას სპეციალურ მონიგრაფია (1932, ბერლინი). იგი უცხოელთაგან ასევე პირველი იყო, ვინც ქართული მრავალხმიანობის „თვითნაჩენობა“ (ილია) აღნიშნა. ყურადღებას იქცევს იზალი ზემცოვსკის სტატია „ქართული მოდელი: ეთნოგეომუსიკოლოგიური მიდგომა ზეპირი პოლიფონიის სამყაროსადმი“, რომელშიც ავტორი ქართულ მრავალხმიანობას განიხილავს, როგორც, საზოგადოდ, ტრადიციული მრავალხმიანობის მოდელს, რადგან მასში მრავალხმიანი სიმღერის ყველა ძირითადი ტიპია წარმოდგენილი და რადგან მრავალფეროვნება ისეთ მცირე ტერიტორიაზე, როგორიც საქართველოა, მსოფლიოში არსად გვხვდება.

ქართული მრავალხმიანობა ზოგადი და კონკრეტული არგუმენტებითაა წარმოდგენილი წარსულისა და თანამედროვე ქართველ ავტორთა – იგნე ჯაგახიშვილის, დიმიტრი არაყიშვილის, შალვა ასლანიშვილის, ვლადიმერ ახობაძის, გრიგოლ ჩხილვაძის, მიხდია ქორდანიას, ვალერიან მაღრაძის, ევსევი ჭოხონელიძის, ვლადიმერ გოგოტიშვილის, ედიშერ გარაყანიძის, მანანა შილაკაძის, თამაზ გაბისონიას, ნინო ციციშვილის, იოსებ ქორდანიას, რუსუდან წურწუმიას ნაშომებში. მათში განხილულია ქართული ტრადიციული მრავალხმიანობის ფორმების, ხმათა მოძრაობისა და კილო-ჰარმონიული თავისებურებები სხვადასხვა დიალექტებში, საკრავიერი მუსიკის საკითხები, ქართული მუსიკალური კულტურის ინტერესულტურული ურთიერთობების, ეროვნული იდენტობის პრობლემა და სხვ.

ამ ნაშრომთაგან უმეტესობა ადრეა შექმნილი, მათი ნაწილი სხვადასხვა (არაინგლისურ) ენებზეა გამოქვეყნებული, ნაწილი – ხელნაწერის სახით ინახებოდა თბილისის კონერვატორიის ქართული ხალხური შემოქმედების ლაბორატორიის არქივში, ზოგიერთი კი სპეციალურად ამ კრებულისთვის დაიწერა.

ცალკე აღნიშნის ღირსია კრებულის გამოცემის აკადემიური დონე – კრებულს ჰყავს ორი რეცენზენტი, მსოფლიო მრავალხმიანობის საყოველთაოდ აღიარებული მკვლევარი ფრანგი სიმპა არომი და ესპანელი ეთნომუსიკოლოგი პოლო ვალესო, რომელთა ვრცელი რეცენზია წიგნის რედაქტორების რუსუდან წურწუმიასა და იოსებ ქორდანიას შესავალთან ერთად წინ უძღვის კრებულს.

ადრე გამოქვეყნებულ სტატიებს ახლავს რედაქტორების კომენტარები, ხოლო კრებულის ბოლოს მოცემულია ქართული მრავალხმიანობის ვრცელი ბიბლიოგრაფია, მონაცემები წიგნში წარმოდგენილი ავტორების შესახებ და ინდექსები.

წიგნის შეძენა შესაძლებელია ინტერნეტით, გამომცემლობის საიტზე:

[https://www.novapublishers.com/catalog/index.php?cPath=23\\_318](https://www.novapublishers.com/catalog/index.php?cPath=23_318)

ვფიქრობ, ეს წიგნი შესანიშნავი საჩუქარია ქართული მუსიკალური კულტურით დაინტერესებული არაქართულენოვანი მკითხველოსათვის.

**ნინო ღამბაშიძე,  
ისტორიის დოქტორი  
თბილისის იუნივერსიტეტის  
სახელობის სახელმწიფო უნივერსიტეტის  
ჯავახიშვილის ისტორიისა და  
ეთნოლოგიის ინსტიტუტი**

## უცხოური მრავალხმიანობა

### პოლო ვალეჟო



## ვაგოგოს (ტანზანია) ტომის მრავალხმიანობა

ტანზანიის ცენტრალურ ნაწილში მცხოვრები ვაგოგოს ხალხი არის ერთ-ერთი, დაახლოებით, 113 ეთნო-ლინგვისტური ჯგუფიდან, რომელიც ხასიათდება კულტურული და მუსიკალური მრავალფეროვნებით. სიგოგოს ენაზე მოსაუბრე ეს ხალხი მისდევს მიწათმოქმედებასა და მეცხველეობას; მათი კუთილდღეობა დამოკიდებულია მარცვლეულისა (ხორბალი, სორგო და ფეტვი) და მიწის თხილის მოსავალზე; ასევე წვიმაზე, რასაც ყველა მათი მატერიალური ცხოვრება. მათი მუსიკა თანაარსებობს ყოველდღიურობასთან, ამიტომ ვაგოგოს ყოფის არც ერთი მომენტი არ არსებობს მუსიკის გარეშე, ისე, როგორც ეს ხდება უმეტეს აფრიკულ ტომებში, სადაც მუზიკირებას აქვს არა ესთუტიკური, არამედ ეთიკური მოტივები.

გოგოს ხალხის თავისებურება კარგად ჩანს, ერთი მხრივ, ხალხის გართობის მომენტებში, როდესაც კოლექტიური მდერის საშუალებით ისინი უზიარებენ ერთმანეთს ემოციებს და, მეორე მხრივ, მაკუმბის რიტუალის დროს (როდესაც ხდება სიყმაწვილედან მოწიფელობაში გადასვლა), მაშინ, როდესაც ტომი ზეიმით აღნიშნავს კარგ მოსავალს. მრავალხმიანობის თვალსაზრისით, მიწათმოქმედების პერიოდთან (იფუა) უშუალოდ დაკავშირებული რეპერტუარი გაცილებით



გაგოგოს ტომი ემბეში (დოდომას რეგიონი)  
© Polo Vallejo, 2006

კომპლექსურია: იყენებენ პოლიფონიის ისეთ ტიპს, რომელიც შედგება მრავალხაზოვანი ტექნიკის სხვადასხვა სახეების კომბინაციებისაგან. ამ თუ იმ ვითარებაში, რიტუალსა და დასვენებას შორის მუსიკა ხდება სოციალური ერთობის არსებითი ფაქტორი. მათი მუსიკის პოლიფონიური კონცეფციის თვალსაზრისით, საინტერესოა იმის ცოდნა, რომ ვაგოგოს ლექსიკაში განსხვავდება „ბრალოდ „სიმღერა“ – კვირა (მიუხედავად იმისა, იდენტურია თუ არა ორი ან მეტი ხმის რიტმული არტიკულაცია) და „პოლიფონია“ – ხილუმი (განაწილება), ასე ვთქვათ, რიტმულად დამოუკიდებელი ვოკალური ხაზების ზემოთ აწევა სემანტიკური მნიშვნელობის არმქონე მარცვლების გამოყენებით.



გაგოგოს ბავშვები მაკუმბის ინიციაციის რიტუალის დროს. © Polo Vallejo, Nzali 2007

ვაგოგოს რეპერტუარში ერთ-ერთი ყველაზე რთულია ხიანდე – „ნაწილი“, „ფრაგმენტი“, რაც სიმბოლურად აღნიშნავს ნიამლუზის ინიციაციის მონაწილე ბიჭუნების წინდაცვეთის დროს მოკვეთილ კანს. ხიანდე სიმღერები სრულდება ა კაპელა, მხოლოდ ძროხის ექვანის ნითღოლოს ან კაიამბას (მარაკა) აკომპანიმენტით. სოციალურად ის 3

მიზნით სრულდება: 1. ზოგადად ნაყოფიერების გასახსენებლად და გამოიყენება, როგორც შეტყობინება წინდაცვეთის წინაღმატებელის; 2. გასართობად, როგორც ქალის მიერ საქმროს არჩევის პაროდია;

3. გამოიყენება ტკივილის შესამსუბუქებლად წინადაცვეთის დროს კანის მოკვეთის მომენტში.

ბოლო მიზნის მისაღწევად მამაკაცები წრეს შემოარტყამენ წინადაცვეთისთვის გამზადებულ ბიჭს და პონო ხდუჯლებს (ანტილოპის რქა) გამაფრთხილებელი ნიშნის შემდეგ ბიჭისკენ მიმართავნ ხმებს, სწორედ მაშინ, როცა მამაკაცები ასრულებენ ხიანდეს (ოსტინატოს, კანონისა და პოკეტის კომბინაცია) მრავალხმიან მონაკვეთს. გარეთ სარიტუალო ადგილთან, იუმბისთან ახლოს ქალები ხმაშეწყობით პარალელურად ასრულებენ სიმღერის დასაწყისს.

ამგვარი მრავლხმიანი შესრულებით მირებულ პოლიფონიურ კომპლექსურობას ვაგოგო იყენებს ტკივილის შესამსუბუქებლად წინადაცვეთის დროს. ხიანდეს რეპერტუარში სემანტიკური ან მნიშვნელობის არმქონე სიტყვები და სოციალური გარემო ურთიერთქმედების უმაღლეს წერტილს აღწევნ და ქმნიან მუსიკალური ტექნიკისა და სოციალური ფუნქციის სიმბიოზს. აქედან წარმოიშვა აზრი იმის შესახებ, რომ ის, რაც ემოციურად მნიშვნელოვანია ვაგოგოს ხალხისთვის, მუსიკალურადაც მნიშვნელოვანი უნდა იყოს. სწორედ ამით აიხსნება ვაგოგოს ხალხის მიერ მრავალხმიანი სიმღერის გამოყენება ამ რიტუალის დროს.

**პოლო ვალეჯო  
მუსიკოლოგიის დოქტორი,  
პედაგოგი და კომპოზიტორი,  
მადრიდის კომპლუტებს უნივერსიტეტის  
ეთნომუსიკოლოგიის ასოცირებული  
პროფესორი**

# ერთი უცხოური ხალხური ანსამბლი

## კორსიკული ანსამბლი „სპარტიმუ“



კორსიკული მრავალხმიანი სიმღერები პირველად მოვისმინე საქართველოში, 1980-იან წლებში. ჩემთვის, ისევე როგორც ბევრი ქართველისთვის, ეს ნამდვილად იყო აღმოჩენა. საბჭოთა კავშირის ცენტრალური ტელევიზიის ეთერში დოკუმენტური ფილმის ჩვენების შემდეგ კორსიკული სიმღერა ერთ დამეში ნამდვილი სენსაცია გახდა. საქართველოში, რომელიც ეთნომუსკოლოგებისა და, ზოგადად, საზოგადოებისთვის ცნობილია, როგორც მრავალხმიანი სიმღერის ქვეყანა. განსაციფრებელია კორსიკული სიმღერის მსაგავსება აღმოსავლეთ საქართველოს სუფრულ სიმღერებთან – გაბმული ბანის ფონზე თავისუფალ მეტრში ორი ხმის იმპროვიზაციით გალამაზებული მელოდია. როგორც ერთმა ჩემმა კოლეგა მუსიკისტონებმ მითხრა, ის თავიდან სკეპტიკურად იყო განწყობილი ქართული ტრადიციული მრავალხმიანობის ჩემეული შედარებითი კვლევის მიმართ (ქართული მრავალხმიანობა ჩვეულებრივ განიხილებოდა, როგორც უნიკალური მოვლენა, რომელსაც არ პქონდა კავშირი სხვა რომელიმე მრავალხმიან კულტურასთან), მაგრამ კორსიკული სიმღერის მოსმენის შემდეგ მან აზრი შეიცვალა.

დაახლოებით ოცი წლის შემდეგ, 2008 წელს, კორსიკაში ჩემი სტუმრობის დროს აღმოვაჩინე, რომ ქართული მრავალხმიანობის პირველ მოსმენას კორსიკებზე ასეთივე ძლიერი მუსიკალური შთაბეჭდილება მოუხდებია. როგორც მასხოვეს, ლეგენდარული ჯგუფის „ვოჩე დი კორსიკას“ („კორსიკის ხმა“) წევრმა ფილიპ როჩიმ მითხრა, რომ მას ჯერ კიდევ მგაფიოდ ახსოვდა სად, როდის და ვისგან მოისმინა პირველად ქართული ტრადი-

ციული მრავალხმიანობა, მიუხედავად იმისა, რომ ეს თითქმის 40 წლის წინ იყო.

კვლევისათვის ძალიან საინტერესო საკითხია, თუ რატომ არის ასეთი ახლო კავშირი ისეთ დაშორებულ კულტურებს შორის, როგორიცაა ქართული და კორსიკული. მინდა ვთქვა, რომ საქართველო და კორსიკა ერთადერთი შემთხვევა არაა მრავალხმიანი სტილების მსგავსების თვალსაზრისით. იგივე შეიძლება ითქვას ლატვიისა და ტიბეტის ან ბულგარეთისა და ინდონეზიის, ლიბერვისა და ნურისტანის მრავალხმიან სიმღერაზე. მე-20 საუკუნის ცნობილი ეთნომუსიკოლოგი იააპ კუნსტი ისე მოიხიბლა ბალგანეთის მთიანეთისა და ინდონეზიის მუსიკალური პარალელებით, რომ სპეციალური ნაშრომიც კი მიუძღვნა შესაძლო ისტორიულ კავშირებს ამ ორ, ერთმანეთისგან დაშორებულ რეგიონს შორის. პოლიფონიური კულტურების შედარებით კვლევას მე შევეხე ჩემს ორ ნაშრომში (1989, 2006). კვლევამ დამმარწმუნა, რომ დაშორებული კულტურების ტიპოლოგიური სიახლოვე საშუალებას გვაძლევს ახლებურად შევხედოთ და ახალ ჭრილში განვიხილოთ მრავალხმიანობის წარმოშობის პრობლემა.

მინდა ავნიშნო, რომ მრავალხმიანობის წარმოშობაზე საყოველთაოდ მიღებული მოსაზრება არ ემყარება არც ერთ ფაქტს. პირიქით, მის თანახმად, გუნდური სიმღერა ადამიანური კულტურის ძალიან ძველი ელემენტია (მაგ. კურტ სახი, ანა კილმერი და ჰანს ჰეკმანი ფიქრობენ, რომ მრავალხმიანობა პქონდათ შუმერებს, ხურიტებსა და ძველ ებებებსაც კი). ჩემი აზრით, ადამიანის გუნდური მრავალხმიანობის შესწავლა შესაძლოა დაგვეხმაროს, ახლებურად შევხედოთ ისეთ პრობლემას, როგორიცაა პოლიფონის წარმოშობა.

მრავალხმიანი სიმღერის კიდევ ერთი საინტერესო ასპექტია ის, რომ იგი გავრცელებულია მსოფლიოს ბევრი რეგიონის იზოლირებულ და რელიტურ გეოგრაფიულ აღგილებში (მაგალითად კავკასიის მთიანეთში, ალპებში, პირინეებზე, ბალკანეთში, ტიბეტსა და ანდებში), კუნძულებზე (კორსიკა, სარდინია, სიცილია, პოდკაიდო, პოლინეზია და მელანეზია) ან დიდი ტყის მასივებში (მაგ. ცენტრალური აფრიკის ტროპიკული ტყეები, აღმოსავლეთ ევროპის ჭაობიანი პოლესიე და სამხრეთ-აღმოსავლეთ აზიის ტყიანი მთები).

მიუხედავად იმისა, რომ პატივცემულმა ფელიქს კულიჩიმ 1940-50-იან წლებში ჩაიწერა კორსიკელი მწყემსების მდიდარი რეპერტუარი, ეთნომუსიკოლოგების უმრავლესობა კორსიკული მრავალხმიანობის შესწავლით საკმაოდ გვიან დაინტერესდა. მაგალითად, მარიუს შნაიდერი 1969 წელს გამოცემული ნაშ-

## ერთი ქართული ფოლკლორული ანსამბლი

„იალონი“



რომის „მრავალხმიანობის ისტორიის“ მეორე ტომში საერთოდ არ ახსენებს კორსიკულ მრავალხმიანობას. შესაძლოა, უცნაურად უღრდეს, მაგრამ აფრიკული მრავალხმიანობის არსებობის შესახებ ეთნომუსიკოლოგებმა რა-მდენიმე ათწლეულით ადრე იცოდნენ, ვიდრე კორსიკული ან ალბანური მრავალხმიანობის შესახებ.

როდესაც კულიჩიმ და მოგვიანებით კოლ-ფგანგ ლადებ ჩაიწერეს კორსიკელი მწყემ-სების სიმღერა, ისინი დარწმუნებული იყვნენ, რომ ეს იყო მომაკვდავი ტრადიცია. შემიძლია დავადასტურო, რომ ვოკალური მრავალხმიანობა მსოფლიოს ბევრ კულტურაში მთლიანად გაქრა. საბედნიეროდ, კულიჩისა და ლადებს პესიმისტური წინასწარმეტყველება არ გამართლდა. პირიქით, 1970-იანი წლებიდან კორსიკული ეროვნული კულტურის მიმართ დამოკიდებულების შეცვლა გახდა კორსიკული კულტურული იდენტობის სიმბოლო. სტატუსის ასეთ ცვლილებას ესაჭიროებოდა კორსიკული ტრადიციული მრავალხმიანობის ძლიერი ფინანსური და მორალური მხარდაჭერა. გაჩნდა ახალი ანსამბლები, ხელმისაწვდომი გახდა კორსიკული სიმღერების ჩანაწერები. ჯგუფები წარმატებით წნევებოდნენ საერთაშორისო არენაზე, ასრულებდნენ კორსიკულ მრავალხმიანობას და უცხოებსაც ასწავლიდნენ.

მიუხედავად თავისი მდიდარი საგუნდო ჟღერადობისა და მრავალხმიანი სიმღერის შესრულების უდავო ოსტატობისა, ანსამბლი „სპარტიმუ“ შედარებით ახალგაზრდა კოლექტივია. ჯგუფის სახელწოდება კორსიკულად ნიშნავს - „მოდით, გავიზიაროთ“. როგორც ფრედერიკ ვესპერინიმ - „სპარტიმუს“ ხელმძღვანელმა მითხრა, ჯგუფის წევრებს მიაჩნიათ, რომ სხვადასხვა კულტურების მიერ მემკვიდრეობების გაზიარებას უდიდესი ძალა აქვს. 2008 წელს „სპარტიმუს“ მონაწილეობა მიიღო ტრადიციული მრავალხმიანობის ობილისის მე-4 და მე-5 საერთაშორისო სიმპოზიუმებში, რის შემდეგაც მათი ინტერესი ქართული მრავალხმიანობის მიმართ კიდევ უფრო გაიზარდა.

**იოსებ ქორდანია,  
მელბურნის უნივერსიტეტის  
პროფესორი**


რუბრიკის სტუმარია მგალობელ გოგონათა გუნდი „იალონი“. გვესაუბრება ანსამბლის ხელმძღვანელი ნინო ნანევიშვილი, რომელიც კ. სარაჯიშვილის სახ. თბილისის სახელმწიფო კონსერვატორიის მუსიკოლოგიის მაგისტრი გახლავთ (საეპლებით მუსიკის მიმართულებით).

ანსამბლი „იალონი“ 2009 წლის მარტის თვეში ჩამოყალიბდა. ეს სახელი დაკავშირებულია ალიონთან (დასავლურ ქართულ კილოკავზე) და, ვინიქობ, ამ სიტყვის ჟღერადობა და შინაარსი შეესაბამება ჩვენს საქმიანობას, ვინაიდან ქართული გაღობა, მისი სული და ბუნება ძალიან წააგავს ახალი დღის გათენებით მოტანილ მადლს, მზის შუქის მოფენას. გარდა ამისა, ვფიქრობთ, რომ ჩვენი, როგორც ანსამბლის საქმიანობაშიც ჯერ გარიურავია მხოლოდ.

გუნდი ამ ეტაპზე შედგება რვა წევრისაგან, რომელთა უმეტესობაც პროფესიით მუსიკოსია.

საქართველოში ქალთა გუნდები, მით უფრო, სამგალობლო, ცოტად. ეს პარადოქსია, რადგან, ისეთი მუსიკალური კულტურის მემკვიდრე ქვეყანაში, როგორიც საქართველოა, ვინიქობ, დიდი და პატარა, ქალი და კაცი უნდა მღეროდეს და გაღობდეს. დღეს ამ დევიციებს სხვადასხვა მიზეზი აქვს... ჩემთვის ყველაზე გულსატკენი ის ფაქტია, რომ ტაძრების უმრავლესობაში მგალობელ ქალთა გუნდები მსახურობენ, მაგრამ სარისხი ძალიან სავალალოა და სრულიად შეუსაბამო იმ მუსიკალურ შედევრებთან, რისი შესრულების საშუალებაც, საბედნიეროდ, უპეარსებობს. სასიხარულოა, რომ თანდათან მიმდინარეობს ტრადიციული სამგალობლო

რეპერტუარის ადდგენა, მაგრამ ეს საქმის ნახევარია, თუ ამას არ მოჰყვა შესაბამისი და საკადრისი პროფესიული დამოკიდებულება და მომზადება.



„იალონის“ რაც შეეხება, გუნდის ჩამოყალიბების იდეა საქართველოში არსებულმა რეალობამ განაპირობა. როდესაც ტაძარში დგანარ და ეცნობი საოცარი სულიერებით აღბეჭდილ, მაღალმხატვრულ ნიმუშებს, ხვდები, რომ შეუძლებელია ამ დონის ლოცვისა და მუსიკის სინთეზის გათავისება და შესრულება დიდი დროის, ენერგიის, პროფესიული მომზადების გარეშე. ამის გააზრების შემდეგ, აღმერა უდიდესი სურვილი მეგალობა ისეთ ადამიანებთან, რომლებთან ერთადაც შევძლებდი რეპერტუარის თანდათან გაფართოებას, შესრულების ხარისხის გაუმჯობესებას. ნელ-ნელა გამოიკვეთა ამის შესაძლებლობა და დვთის ნებით მოხდა „იალონის“ შემადგენლობის თავმოყრა.

რეპერტუარის ძირითად წყაროდ ქართული ტრადიციული გალობის სანოტო ხელნაწერებს (ხელნაწერთა ეროვნული ცენტრი) და საპატრიარქოს საეკლესიო გალობის ცენტრის გამოცემებს ვიყენებთ.

რაც შეეხება ჩვენი მუშაობის ფორმას, უფიქრობ, ყველა შემოქმედებითი კოლექტივისთვის უმნიშვნელოვანები და გადამწყვეტია რეპეტიციები, მათი ხარისხი და ინტენსივობაა. აქ ხდება გუნდის წევრების მონაცემების, შემოქმედებითი უნარების, თავისებურებების უკეთ შესწავლა, ფუნქციების გადანაწილება და ა.შ. ჩვენს შემთხვევაში, ასევე ძალიან მნიშვნელოვანია ერთად გალობა დვთისმსახურებებზე. ამ პროცესში სულ სხვა უნარები იჩენს თავს და მათი შეჯერებით ხდება შესაძლებელი გუნდის მომავალი გეგმების დასახვა.

„იალონი“ ქართველი მსმენელის წინაშე ორი სოლო კონცერტით წარსდგა. ინტენსიურად ვმონაწილეობ ასევე ქართული სიმღერას.

რაგალობის სადამოებში, თუმცა, ჯერჯერობით, საქართველოს ფარგლებში.



გარდა ჩვენს მიერ ორგანიზებული ღონისძიებების და ჩაწერებისა, ჩართული ვართ სხვადასხვა პროექტში. მაგალითად, ნანა ჯანელიძის ფილმისათვის „გალობის რაინდები“ ჩავწერეთ რამდენიმე საგალობელი, რომელიც კომპაქტდისკის სახით გამოიცა (2009). 2010 წლის მიწურულს პოლონეჟის საელჩოს ორგანიზებით ანსამბლ „ისონთან“ და რამდენიმე მუსიკოსთან ერთად ჩავწერეთ პოლონეჟის საშობაო სიმღერა-საგალობლების კომპაქტდისკი.

„იალონის“ გამოცემული აქვს ორი სოლო კომპაქტდისკი. პირველში შესულია ყოვლადწმიდა ღმრთისმშობლის საგალობლები (გმლათის სკოლა) (2010წ). მეორეში კი – ბოლო სოლო კონცერტზე (31.01.2011) წარმოდგენილი პროგრამა – დასავლეთ და აღმოსავლეთ საქართველოს სამგალობლო კილოს საკელები რვა ხმის საგალობლები „დმერთი უფალი“ და აღდგომის ტროკრები. წარმოდგენილი მასალა, ვიზუალური ხელს შეუწყობს მგალობელთა გუნდების მიერ რვა ხმის საგალობლების შესწავლას (მით უმეტეს, რომ გელათის სკოლის საგალობლები გამოცემულია სასწავლო მიზნით, ცალ-ცალკე ხმებად).

მომდევნო ეტაპზე გვსურს განვაგრძოთ კვლავ რვა ხმის სისტემის საგალობლებზე მუშაობა (უფალო დაღად კუავ, აწ განუტევე...). ასევე მნიშვნელოვნად მიგვაჩნია ქართული ტრადიციული საგალობლების პოპულარიზეცია საკონცერტო საღამოების მოწყობით, როგორც თბილისში, ასევე საქართველოს სხვადასხვა რეგიონებში. ასეთი ღონისძიებები მეტად გააღვივებს ინტერესს და გააღვიძებს იმ მიზნებულ გენეტიკურ მესხიერებას, ცოდნის მოყვარებას, სიბრძნესა და რწმენას, რამაც ჩვენს წინაპრებს ამგვარი სულიერი, მხატვრული ღირებულების შედევრების შექმნა შთააგონა.

# ქართული სიმღერის უცხოელი შემსრულებლები

შვედური ანსამბლი „დოლური“



ანსამბლი „დოლური“ დაარსდა 1995 წელს იოჰან ვესტმანის მიერ. 1996 წელს ჯგუფმა პირველად იმოგზაურა საქართველოში შვედურ-ქართული საზოგადოებისა და თბილისის სახელმწიფო კონსერვატორიის დახმარებით, აქედან დაიწყო „დოლურის“ მეგობრობა ანსამბლებთან „თბილისი“ და „გეორგიკა“. იოჰან ვესტმანის ხორვეგიაში გადასვლის შემდეგ ჯგუფს ხელმძღვანელობდა იენს მოლერი.

2001 წელს „დოლურმა“ კიდევ ერთხელ იმოგზაურა საქართველოში, სადაც ჩატარა კონცერტები და შედგა მისი დებიუტი საქართველოს ტელევიზიით. მას შემდეგ ანსამბლის წევრები საქუთარი ინიციატივით დროდადრო სტუმრობდნენ საქართველოს პატარა ჯგუფებად. „დოლურის“ რეპერტუარში არის საქართველოს ყველა კუთხის სიმღერა. ამჟამად ჯგუფის წევრები არიან: იოჰან ვესტმანი, იენს მოლერი, ანდერს რიმპი, კალე სტინცინგი, მარტუს ალბერგი, ევტინი გაბუნია, ფანი უმარეუსი, ერიკ რუში, მატს ჰულანდერი და სტეფან სანდსტრომი. თუმცა ჯგუფის კონცერტებში ანსამბლის ყოფილი წევრებიც ხშირად იღებენ მოხაწილეობას.

იენს მოლერის ბრიუსელში გადასვლის შემდეგ ანსამბლში დემოკრატიული მმართველობაა და ფაქტობრივად ყველა წევრი ხელმძღვანელია. გარდა „თბილისთან“ და „გეორგიკასთან“ თანამშრომლობისა, „დოლურის“ წევრებმა ქართული ხალხური სიმღერები შეისწავლეს ანსამბლ „ანჩისხატისგან“, ვაჟა გოგოლაძისგან, ისლამ და ვახტანგ ფილიფანებისგან. „დოლური“ აპირებს მონაწილეობა მიიღოს ტრადიციული მრავალხმიანობის თბილისის მე-6 საერთაშორისო სიმპოზიუმში. ამჟამად ჯგუფი ხშირად მონაწილეობს შვედეთში გამართულ სხვადასხვა სახის კონცერტებსა და დონისძიებებში.

# ქართული ხალხური სიმღერის მოამაგებები

ძუკუ ლოლუა  
(1877-1925)



ლეგენდარული ლოტბარი და მომღერალი, ლოტბარ-მომღერალთა მთელი თაობის აღმზრდელი, ხალხური სიმღერების შემგროვებელი და პოპულარიზატორი, მკვლევარი და საზოგადო მოღვაწე ძუკუ (პორფილე) ლოლუა დაიბადა სოფელ ქვალონში (ხობის რ-ნი), ლარიბი აზნაურის ოჯახში. საეკლესიო მწიგნობრობისა და გალობის დაუფლების შემდეგ ძუკუ ლოლუა მშობლიურ მხარეში მედავითედ გამოწესეს. გამორჩეული სმენისა და ლამაზი ხმის წყალობით მას მოედ სამეგრელოში იცნობდნენ, ხოლო მომღერალთა გუნდის ჩამოყალიბებისა და საკონცერტო ტურნეების მოწყობის შემდეგ 19 წლის ჭაბუკი ნიჭიერ ლოტბარადაც აღიარეს.

1897-1898 წლებში ძუკუ ლოლუა თავისი ახლადდაარსებული მეგრელ მომღერალთა გუნდით აფხაზეთში ჩავიდა. ამიერიდან მისი მოღვაწეობა აფხაზეთს უკავშირდება.

1903 წელს, ილია ჭავჭავაძის პატივსაცემად გამართულ ნადიმზე, რომელიც სოხუმის მოწინავე საზოგადოებამ შარვაშიძეების კარმილამოში გამართა, ძუკუ ლოლუას ანსამბლს აფხაზური და საქართველოს სხვა კუთხეების სიმღერებით და იშვიათი ცეკვებით დაუშვენებია სუფრა.

1904 წლიდან კი ქართველთა შორის წერაკითხვის გამავრცელებელი საზოგადოების თხოვნით ძუკუ ლოლუა სოხუმში საცხოვრებლად გადავიდა. აფხაზეთის გარუსების პოლიკის შედეგად შესუსტებული ეროვნული

მუხტის გასაღვივებლად ძუკუ ლოლუას დიდი ხალხური გუნდის ჩამოყალიბება სთხოვეს. აქედან იწყება მის ბიოგრაფიაში 15 წლიანი საღოტბარო მოღვაწეობის პერიოდი აფხაზეთში.

პირველ ქართულ-აფხაზურ გუნდს განსაკუთრებული ადგილი უჭირავს არა მარტო ტრადიციული მუსიკის შემსრულებლობის, არამედ ქართულ-აფხაზური ურთიერთობების ისტორიაში. გუნდში აფხაზები, მეგრელები, იმერლები, გურულები, სვანები, სხვადასხვა ასაკისა და სოციალური ფენის წარმომადგენლები გვერდიგვერდ მდერლენენ. ძუკუ ლოლუამ სავსებით სწორად აირჩია ის საშემსრულებლო მიმართულება, რომელიც სცენაზე ფოლკლორის სინკრეტული ბუნების წარმოჩენას გულისხმობდა: გუნდის წევრები სხვადასხვა საკრავებზე უკრავდნენ და ცეკვავდნენ. ამ გუნდმა პირველმა გამოიტანა სცენაზე აფხაზური საკრავები აფხიარცა, ჟარაპანი, აიუმაა, სვანური ჭუნირი და ჩანგი, მეგრული ჩონგური და იმერული დაირა. რეპერტუარის შერჩევისას აფხაზურს და საქართველოს სხვა კუთხის ნიმუშებს თანაბარი ადგილი ეთმობოდა.

ძუკუ ლოლუამ სიმღერის თეატრალიზაციის ხერხს მიმართა, ის სცენაზე ვრცელ თეატრალურ კომპოზიციებს ქმნიდა, რასაც აფხაზები თავისი თეატრის სათავედ მიიჩნევენ.

პირველი ქართულ-აფხაზური გუნდის პრეზენტაცია 1904 წლის 25 სექტემბერს შედგა. ეს თარიღი აფხაზეთში საგუნდო საქმიანობის საწყისად ითვლება.

ძუკუ ლოლუას სოხუმში ოთხი გუნდი დაუარსებია: I – 1904 წელს; II – 1911 წელს; III – 1912 წელს და IV – 1919 წელს. გარდა ამისა, ცნობილია, რომ ლოტბარს მუშაობა რამდენიმე სასიმღერო კოლექტივიც ჩამოუყალიბებია სოხუმსა და სოჭში.

ძუკუ ლოლუამ საგუნდო საქმიანობა აფხაზეთში ავთენტიკური შემსრულებლობის გზით წარმართა. მის მიზანს ხალხური ნიმუშის უცვლელებელ შესრულება, სამუშაო მეოთხს კი სიმღერის ზეპირი გზით შესწავლა წარმოადგენდა. მართალია, ქართული ტრადიციული შემსრულებლობისათვის უცხო მოვლენა იყო მრავალრიცხოვანი (ზოგჯერ 80-კაციანი) გუნდი ზედა ხმების ჯგუფური შესრულებით, მაგრამ, დროის, ადგილისა და გარემოებათა გათვალისწინებით, ეს ფაქტი კრიტიკის საგანი არ გამხდარ. ეროვნული მუსიკალური ჰანგების, საბოლოო ჯამში კი ეროვნული კულტურის გადარჩენისათვის ბრძოლაში ძუკუ ლოლუამ ათასობით ადამიანი ჩააბა. შეიძლება ითქვას, რომ აფხაზეთში ხალხური მუსიკის შემსრულებლობა მთლიანად ქართულ-აფხაზური გუნდიდან ამოიზარდა.

1917-1918 წლებში ძუკუ ლოლუამ თავისი ეთნოგრაფიული გუნდები თბილისშიც ჩამოიყვანა და ფართო საზოგადოებას გააცნო. ამის შემდეგ მკვიდრდება აფხაზური ნიმუშები ქართულ საშემსრულებლო პრაქტიკაში, რაც, თავის მხრივ, ხელს უწყობს მათ გავრცელებას მთელ საქართველოში. გარდა ამისა, გუნდის წევრებს, შემდგომში ცნობილ ლოტბარებს – კიწი გეგმეკორს, კირილე პაჭკორიას, ვანო კოზმავას, მაქსიმე ანუას, ძლიკი ძიაფშიფას, რემა შელეგიას, პლატონ ფანცულაიას თავიანი გუნდების რეპერტუარშიც შეჰქონდათ ძუკუ ლოლუას მიერ სცენაზე გამოტანილი აფხაზური სიმღერები. ესენია: „აყიში“, „აზარი“, „დაჭრილის სიმღერა“, „საცეკვაო“, „დიღინი“, „შარათინი“ და მრავალი სხვა.

მომდევნო წლებში ძუკუ ლოლუა აფხაზეთში ადარ მოღვაწეობდა, მაგრამ ამ კუთხის სიმღერებს მნიშვნელოვანი ადგილი ეჭირა მისი გუნდების რეპერტუარში, რაც ხელს უწყობდა აფხაზური კულტურის პოპულარიზაციას.

სოხუმში ყოფნის პერიოდში ძუკუ ლოლუა შემოქმედებით მოღვაწეობას აქტიურ საზოგადოებრივ საქმიანობას უთავსებდა. მან გახსნა ქალაქში პირველი წიგნის ფარდული სამკითხველოთი, მისი თაოსნობითა და ადგილობრივ მოღვაწეთა დახმარებით აღიძრა ფილარმონიული საზოგადოების დაარსებისა და სამუსიკო სკოლის ჩამოყალიბების საკითხი. 1919 წელს ქართული სამუსიკო საზოგადოების კოლეგიამ სწორედ ძუკუ ლოლუას თხოვნით მიავლინა სოხუმში ცნობილი მოღვაწე ზაქარია ჩხიკვაძე, რომელმაც ჩამოაყალიბა ამავე საზოგადოების აფხაზეთის განყოფილება. სამუსიკო სკოლის დაარსება კი 1921 წელს მოხერხდა.

ძუკუ ლოლუამ არამარტო პრაქტიკულად, არამედ თეორიულადაც შეისწავლა აფხაზური ფოლკლორი და მას ორი წერილი მიუძღვნა: „აფხაზეთის მუსიკა“ და „პატარა საუბარი აფხაზთა სახალხო მუსიკისა და სიმღერების შესახებ“.

ძუკუ ლოლუა ნამდვილი ლიდერი იყო არა მარტო ხელოვნების სფეროში: 1918 წელს თურქების შემოსვევის დროს მან მეგრელ-აფხაზთა 130 კაციანი რაზმი შეკრიბა და საქართველოს ტერიტორიული მთლიანობის დასაცავად ბათუმში ჩაიყვანა.

ძუკუ ლოლუას ნიჭიერება, ინტერესთა მრავალფეროვნება, შემოქმედებითი აქტიურობა და პატრიოტული სული მას ჭეშმარიტად დიდი საზოგადო მოღვაწეების გვერდით აყენებს.

**მარინა კვიშინაძე**  
**ზ. ფალიაშვილის სამუსიკო**  
**გიმნაზიის პედაგოგი**

## ქართული პრესის ფურცლებზე

### ქართული ხალხური საგუნდო მუსიკის ისტორიისათვის



ქართველმა ხალხმა თავისი მუსიკალური ნიჭი და შემოქმედებითი უნარი უმეტესად სასიმღერო ხელოვნების დარგში გამოავლინა.

ისტორიული და ლიტერატურული წყაროებით ირკევვა, რომ ხალხური სიმღერის სათავეებს მივყავართ ათასეული წლების სიღრმეში. ქართველმა ხალხმა ჯერ კიდევ შორეულ საუკუნეებში გამოიმუშავა მტკიცე მუსიკალური ტრადიცია და შექმნა ფრიად ორიგინალური მრავალხმიანობა, რაც საფუძვლად დაედო ქართული ხალხური საგუნდო კულტურის აღრინდელ განვითარებას.

ქართველ ხალხში ძველთაგანვე ჩაისახა პარმონიულ-პოლიფონიური აზროვნება, რამაც მძლავრი ბიძგი მისცა მრავალხმიანობის წარმოშობას და ეროვნული კულტურის აღმავლობის პარალელურად, მის შემდგომ განმტკიცებასა და თანდათანობით განვითარებას. მრავალხმიანობა ქართული ხალხური მუსიკალური შემოქმედების ქვაკუთხედია, ხოლო გუნდური ერთხმიანობა – მისი ისტორიული წარსული.

ქართველმა ხალხმა დღემდე შემონახა რამდენიმე ნიმუში გუნდური ერთხმიანობისა, რომელსაც ვხვდებით უმთავრესად აღმოსავლეთ საქართველოს მთიელების (კერძოდ, თუშ-ფშავ-ხევსურების), აგრეთვე მესხურ და ლაზურ მუსიკალურ ფოლკლორში.

ქართული საგუნდო კულტურის საწყისების გამორკვევისას დიდი ნიშვნელობა ენიჭება აღმოსავლეთ საქართველოში შემონახულ ორხმიან სიმღერებს. ესენია: საკულტო-საწესო („დიდება“, „მზე შინა“, „ზარი“, „იავ-ნანა“) შრომის („ჰერიო“, „ჰერიეგა“) და საფერხულო სიმღერები („ნანავდა“, „მუმლი მუხასა“, „სათამაშო“).

საკულტო-საწესო სიმღერები სრულდება ერთი მთქმელის, ან ერთიმეორის შენა-

ცვლებით, ორი მთქმელის მეერ გუნდის ფონზე, რომელიც გაბმულ ბანს შეუხმობს.

შრომისა და საფერხულო სიმღერებში რიტმის გამახვილება გავლენას ახდენს ბაზზე, რომელიც საკულტო სიმღერების საორგანო პუნქტისაგან განსხვავებით, როგორც რიტმულად, ისე ინტონაციურად მოძრავი ხდება და basso ostinato-ს ქმნის.

როგორც დღემდე ჩაწერილი ფოლკლორული მასალის შესწავლამ დაგვარწმუნა, ორხმიანობის ეს ორი ძირითადი სახე წარმოადგენს ქართული ხალხური ორხმიანი საგუნდო კულტურის მთავარ საფუძველს.

ამასვე ვამჩნევთ მეგრულ მუსიკალურ ფოლკლორში, სადაც წარმოდგენილია ორხმიანობის მხოლოდ პირველი სახე – სოლისტი გაბმული ბანის თანხლებით.

მუსიკალური სტრუქტურის მხრივ განსხვავებულ ორხმიანობას ვხვდებით აჭარულ სასიმღერო შემოქმედებაში. აქ ორი ხმა პოლიფონიურად არის შეფარდებული. შეიძლება ითქვას, რომ ორხმიანობის აჭარული ნიმუშები ქართველი ხალხის განვითარებული მუსიკალური აზროვნების პროდუქტია.

ქართველმა ხალხმა თავის მესხიერებაში დღემდე შემონახა რამდენიმე სიმღერა, ორხმიანობის მეტად პრიმიტიული ნიმუში, რომელიც ქართული ხალხური მრავალხმიანობის ჩანასახს, დასაბამს, მისი ჩამოყალიბების ადრინდელ საფეხურს უნდა წარმოადგენდეს. ასეთ ორხმიანობას ვხვდებით ხევსურულ მუსიკალურ ფოლკლორში („ხუთშაბათ გათენდება“). აქ ბანი ერთვება სიმღერის ყოველი მუხლის დასასრულს უნისონში, რომელიც ტონიკას წარმოადგენს, ამიტომ პარმონის შეგრძნება ვერ არის ჯერ კიდევ ნათლად გამომედავნებული.

ქართულ მუსიკალურ ფოლკლორში მთავარი ადგილი უჭირავს სამხმიანობას, რომელიც გამოხატავს ქართველი ხალხის ცხოვრების ყოველ მხარეს. სწორედ სამხმიან სიმღერებში გამოავლინა ქართველმა ხალხმა თავისი მუსიკალური ნიჭი, შექმნა ეროვნული სასიმღერო შემოქმედების კლასიკური ნიმუშები. შორეული საუკუნეებიდან მომდინარე საინტონაციო პრაქტიკამ და მუსიკალური ტრადიციების უსაზღვრო მრავალფეროვნებამ განაპირობა ქართული საგუნდო ხელოვნების ფართო განვითარება და მაღალი საშემსრულებლო ოსტატობა.

ქართული ხალხური სამხმიანობისათვის დამახასიათებელია უანრებისა და ფორმების დიდი ნაირსახეობა. უანრების მიხედვით შეიძლება გამოვყოთ შრომის, საგმირო, საწესო, საყოფაცხოვრებო, მგზავრული, სუფრული, სატრიფიალო, ლირიკული, სალაშქრო, საცეკვო, საფერხულო, სახუმარო და სხვა სიმღერები. ფორმის მხრივ ვხვდებით როგორც

სტროფულ, ისე ფართოდ გაშლილ-განვითარებულ სამხმიან სიმღერებს.

ნაირფეროვნებას იძლევა ასევე სიმღერის ჟუსიკალური აღნაგობისა და ხმათაშორის ურთიერთდამოკიდებულების სხვადასხვაობა, აგრეთვე, თითოეული ხმის მონაწილეობა სიმღერის მხატვრული სახის შექმნაში.

აღნიშნული ნიშნების მიხედვით აღმოსავლეთ საქართველოს სასიმღერო შემოქმედებაში უმთავრესად შემდეგი ჯგუფის სამხმიან საგუნდო ნიმუშებს ვხვდებით: 1. განაპირა ხმები ოქტავაში მოძრაობები, ხოლო მელოდია მეორე ხმას მიპყავს; 2. ძირითადი მელოდია ზევითა ხმას მიპყავს. მეორე ხმა უმთავრესად ტერციულ შეფარდებაშია; 3. სიმღერის წამყვანი პირველი ხმა, მაგრამ მეორე ხმაც დამოუკიდებელ მელოდიურ ქარგას ქმნის და პირველთან პოლიფონიურ შეხამებას იძლევა; 4. ორი ზევითა ხმა ხან ერთიმეორის შენაცვლებით, ხან პარალელური მოძრაობით ავითარებს სიმღერას. ბანი ოთხივე შემთხვევაში ასრულებს პარმონიულ ფუნქციას და უმთავრესად საორგანო პუნქტს წარმოადგენს. აქვე აღვნიშნავთ, რომ სამხმიან სიმღერაში დამწყებად, უპირატესად, მეორე ხმაა მიჩნეული.

ქართული თვითმყოფი ხალხური პოლიფონია მთელი თავისი ნაირფეროვნებით წარმოდგენილია იმერულ, გურულ, მეგრულ და აჭარულ სამხმიან სიმღერებში. მაგრამ მათ შორის კონტრაპუნქტული ხერხების სირთულით, ხმათა ურთიერთდამოკიდებულების თავისებურებებით და ინტონაციურად განვითარებული ბანის აქტიური მონაწილეობით გამოირჩევა გურული სიმღერები. ისინი გვათვებს ტექნიკურად მდიდარი, რთული და მრავალფეროვანი მუსიკალური მასალით, რომელიც განვითარებულია პოლიფონიური საწყისის საფუძველზე და ეს პოლიფონია წარმოდგენილია მეტად რთულ კომპლექსებში შველა კონტრაპუნქტული ხერხით.

ფართო საზოგადოებისათვის ქართული ხალხური საგუნდო კულტურის გასაცნობად პირველი პრაქტიკული ნაბიჯი ცნობილმა ქართველმა მოღვაწემ ხარლამპი სავანელმა გადადგა. მან 1873 წელს ჩამოაყალიბა გუნდი და ქართული საგუნდო სიმღერების გამომზეურებისა და ფართო პროპაგანდის საქმეში დიდი როლი ითამაშა. მართალია, ხარლამპი სავანელის გუნდმა დიდხანს ვერ იარსება, მაგრამ ქართული გუნდის არსებობა ხალხის მოთხოვნილებად გადაიქცა და მას მიმღევრებიც გამოუწიდნენ. 1885 წელს ლადო აღნიაშვილმა ჩამოაყალიბა „ქართული ხორ“, რითაც გზა გაუკავა ქართული საგუნდო კულტურის აღორძინებასა და მის შემდგომ განვითარებას. ილია ჭავჭავაძემ ამ გუნდის მიერ გამართული პირველი კონცერტი ქება-

დიდებით მოიხსენია, დიდი მომავალი უწინასწარმეტყველა და მის მოღვაწეობაში ქართული ეროვნული პროფესიული მუსიკის შექმნისა და განვითარების დიდი შესაძლებლობა დაინახა.

ქართული საზოგადოების ერთსულოვანმა გამომახილმა მეტად გაამხნევა როგორც ლადო აღნიაშვილი, ისე გუნდის წევრები და მათ ირგვლივ შემოკრებილი ახალგაზრდა მუსიკოს-მოღვაწენი, რომელთაც უფრო გაცხოველებული ენერგიით განაგრძეს მუშაობა. . .

**გრიგოლ ჩხიგვაძე  
(უურნალი „საბჭოთა ხელოვნება“,  
1954, №4)**

# ქართული კულტურისა და მეცნიერების კერები

## თბილისის არხოლდ ჩიქობავას სახელობის ენათმეცნიერების ინსტიტუტი



არხოლდ ჩიქობავას სახელობის ენათმეცნიერების ინსტიტუტი დაარსდა 1941 წელს, 1936 წელს შექმნილი აკად. ნ. მარის სახელობის ენის, ისტორიისა და მატერიალური კულტურის ინსტიტუტის (ენიმქი) ბაზაზე.

ინსტიტუტის ძირითადი მიმართულებაა ქართული ენის შესწავლა როგორც ნორმატიული, ისე ისტორიული თვალსაზრისით; სხვა ქართველური (მეგრულ-ჭანური /ლაზური, სვანური/) და მთის იბერიულ-კავკასიური (აფხაზურ-ადიღური, ნახური, დაღესტენური) ენების ფონეტიკის, გრამატიკული სტრუქტურის, სინტაქსის, ლექსიკისა და დიალექტოლოგიის საკითხების კვლევა სინქრონულ და დიაქრონულ ასპექტში, აგრეთვე ტიპოლოგიური თვალთახედვით ამ ენათა სხვა ჯეზფის ენებთან კონტაქტები.

ენათმეცნიერების ინსტიტუტი ერთადერთი სამეცნიერო დაწესებულებაა, სადაც შეისწავლება იბერიულ-კავკასიური (პალეოკავკასიური) ოჯახის 30-ზე მეტი ენა, რომელთაგან დამწერლობის მქონეა 15.

ენათმეცნიერების ინსტიტუტში შეიქმნა ფუნდამენტური გამოკვლევები, რომლებმაც არსებითად განსაზღვრა ენათმეცნიერული აზრის განვითარება საქართველოში:

ინსტიტუტის მიერ შექმნილმა უმნიშვნელოვანებამ გამოკვლევებმა, მის მიერ ჩატარებულმა მრავალფეროვანმა სამუშაომ ქართულ საენათმეცნიერო სკოლას დამსახურებული ავტორიტეტი მოჟავოა. ინსტიტუტმა სამართლიანად დაიმკიდრა მსოფლიოში ქართველური და მთის კავკასიური ენების შესწავლის სამეცნიერო ცენტრის სახელი. ქართული საენათმეცნიერო სკოლის შედეგებსა და პრინციპებს იზიარებენ და ემყარებიან საქართველოს ფარგლებს გარეთ მოღვაწე კავკასიოლოგებიც, რამაც განაპირობა ქარ-

თველ ენათმეცნიერთა მიწვევა და აქტიური მონაწილეობა საერთაშორისო სამეცნიერო კონფერენციებსა და სიმპოზიუმებზე.

ენათმეცნიერების ინსტიტუტს მუდმივი სამეცნიერო კონტაქტები აქვს უცხოეთის სხვადასხვა სამეცნიერო ცენტრთან. ქართველ მეცნიერებს იწვევენ მსოფლიო სამეცნიერო კონფერენციებსა და სიმპოზიუმებზე. უკანასკნელ ხანს 20-ზე მეტი თანამშრომელი მოწვევით იმყოფებოდა გერმანიაში, საფრანგეთში, ინგლისში, შვედეთში, ისრაელში, ირანში, თურქეთში, პოლანდიაში, რუსეთში და სხვ. ახალგაზრდა მეცნიერი თანამშრომლები მივლინებით იყვნენ შრი-ლანკაში, პოლანდიაში, საფრანგეთსა და გერმანიაში. თანამშრომელთა ერთმა ჯგუფმა რამდენიმე პროგრამა განახორციელა ლუნდის უნივერსიტეტის ლინგვისტიკისა და ფონეტიკის დეპარტამენტან ერთად, აგრეთვე ფრანგულტისა და მიუნხენის უნივერსიტეტებთან თანამშრომლობით.

ინსტიტუტისთვის უმნიშვნელოვანეს ამოცანას წარმოადგენს ქართველურ ენათა დიალექტური და დარგობრივი ლექსიკონების სრული კორპუსის შექმნა. ამ მიზნით ინსტიტუტი ახორციელებს ქართველი ენის სახელმწიფო პროგრამის ლექსიკოლოგიური განაკვეთის პირველ ეტაპს. ამ პროგრამით „უკავებამცემულია „ხევსურული ლექსიკონი“ (2005), „თუშური ლექსიკონი“ (2003), „გურული ლექსიკონი“, „ქართლური ლექსიკონი“, „ქართლური განმარტებითი ლექსიკონის“ ახალი რედაქციის პირველი ტომი (2007-2008) და მზადება დიდი ქართულ-რუსული ლექსიკონი. ინსტიტუტში ასევე შედგენილია „ინგილოური ლექსიკონი“, „ჭანური ლექსიკონი“, „ფშაური ლექსიკონი“. განსაკუთრებული აღნიშვნის დირსია „სვანური ლექსიკონი“.

ბოლო დროს გამოიცა „ქართული ენის ორთოგრაფიული ლექსიკონი“, „ურნალისტის სტიკური ცნობარი“, „ქართული სიტყვის კულტურის საკითხების“ რამდენიმე ტომი.

ინსტიტუტის მონაწილეობით და ხელმძღვანელობით გამოსაცემად მომზადდა ენციკლოპედია „ქართული ენა“. ეს არის ქართული ენის შესახებ უმნიშვნელოვანესი განმაზოგადებელი ნაშრომი, რომელიც წარმოაჩენს ქართული ენის სტრუქტურის, ქართული ლინგვისტური აზრის განვითარების ძირითად ეტაპებს, წარმოგვიდგენს კულტურისა და მეცნიერების იმ ცენტრებს, რომლებმაც არსებითი წვლილი შეიტანეს ქართული სალიტერატურო ენის ჩამოყალიბებასა და განვითარებაში.

ინსტიტუტი სისტემატიკურად მუშაობს ქართული სამეცნიერო-ტექნიკური ტერმინო-

**„კირიალესა“**

ბერძნული ფორმულა კირიკ ელეგისონ (უფალო შეგვიწყალე) საქართველოში რამდენიმე სიმღერის სახელწოდებასა და რეფრენში დასტურდება, ოღონდ გახალხურებული, მოღიცირებული ფორმით: კირიალესა, ლეიხოს და კირია, კილილესა, კრიალესო, კისადე კირიკ.

კირიალესას სამეგრელოში ახალი წლის მისალოცად კარდაპარ ჩამოვლისას დღესაც ასრულებენ. აღნიშნული მსვლელობა დეტალურად აქვს აღწერილი XVII საუკუნის იტალიელ მისიონერს, თეატინელ ბერს – არქანჯელო ლამბერტის: „ახალწელიწადს დიდ პატივსა სცემენ და ფრიად დღესასწაულობენ მეგრელები... გათხებისას გაემართებიან ბატონის სახლისაკენ. ამ პროცესიაში თითოეულს სასახლისაკენ მიაქვს ის, რაც შეპფერის მის ხელობას. მაგალითად, სახლთუხუცესი ყველაზე წინ მიდის და მოაქვს ხონჩაზე დაწყობილი ორი ოქროს გვირგვინი, ძვირფასი ქვებით შემკული – ერთი მთავრისათვის, მეორე დედოფლისათვის. ამას მისდევს მეჯინიბეთუხუცესი, რომელსაც მიჰყავს შემკული ცხენი. ვისაც ჯოგები აბარია – მსუქანი ხარი. მწერებს – საუკეთესო ბატკანი, მზარეულებს – გოჭები და ხოხბები, ხაბაზს – პური, მეღვინეს – ღვინო, მებაღეს – ხილი. ამათ მოსდევს საუკთხესო საეკლესიო ტანსაცმელში შემოსილი სამდვდელოება ხატებით ხელში. მთელი ეს პროცესია მხიარულად მიიმდერის კირილესონ, კირილესონ. ერთი რომ იტყვის, სხვები პასუხს გასცემენ. სახლის კარს რომ მიუახლოვდებიან, ერთი მათგანი შემოსავს კარს სუროთი... კირილეისონის გალობით შედიან სასახლეში, ყველა ოთახს შემოივლიან და სუროთი შემოსავენ“ (არქანჯელო ლამბერტი – სამეცნიერო აღწერა. თბ. 1938:137-138). ცნობილია, რომ მომდერლებს ვაშლით, ბროწეულით და ყვავილებით შემკული ჩიჩილაკიც დაჟერნდათ ხოლმე. აღილოობისა და ჭონაზე სიარულის მსგავსად, კირიალესას მთქმელები სანოვაგესა და ფულს აგროვებდნენ.

– პეტრე, მასპინძელო, კარი გააღე/ ახალ წელს მოგილოცავ!/ეს ძველი და სხვა – ახალი/ სიკეთით გაიხარე/ ვერას გაკლებდეს ეშმაკი და მზაკვარი/ შენი ბედელი – ღომის მარცვლით აივსოს/ შენი მარანი – ღვინით აიგსოს/ შენი აპვანი – დალოცვილი/ შენი დამწყევლები – ამომწყდარი/ მოხუცებული თუ გყავს – მიეღწიოს შეიდას წლამდე/ შორს თუ გყავს ვინმე – მშვიდობით დაგბრუნებოდეს/ ერთი რაიმე დამიმატე შენაგ-

როვებ ფულზე! – ასეთია ამ საახალწლო მიღოცის სიტყვიერი ტექსტების ქართული თარგმანი.

ადსანიშნავია, რომ კირიკ კლეისონის დღეისათვის ჩვენს ხელთ არსებული 8 ქართული ვარიანტიდან 4 – სწორედ მეგრული საახალწლოა და მათი ინტენსიური ანალიზი აშკარად ავლენს კავშირს საფერხულო წყობის ნიმუშებთან. ერთი – იმერული კრიალებო სააღდგომო ფერხულად არის დაფიქსირებული. ვფიქრობ, ეს ფაქტი კარგი არგუმენტია საშობაო და სააღდგომო სიმღერების ერთი წყაროდან მომდინარეობის მტკიცებისათვის, ხოლო მათი შესრულების საფერხულო წესი მართლაც რიტუალის წარმართულ ხანაში წარმოშობაზე უნდა მიგვანიშნებდეს. დიმიტრი არაყიშვილის მიერ 1902 წ. სამეგრელოში ჩაწერილი ლენონ და კირია და უნგრელი კონსტანტინე კოვაჩის მიერ 1929 წ. სამურზავანოში მოპოვებული კილოლება მინდვრის ან ყანის სამუშაოების დასრულებისას სათქმელი ორხმიანი სიმღერებია.

გ. ელიავას ხელნაწერი მასალების მიხედვით ირკვევა, რომ კირიკ კლეისონის კიდევ ერთი ვერსია სამეგრელოში (სოფ. ბანდა) აღდგომიდან მერვე დღეს გამართულ ჭვენიერობის დღესასწაულს უკავშირდება. ნინო

ლამბაშიძის მიერ მოპოვებული ინფორმაციით, სიმღერა ესადე კირიკ ასრულებდა მუხის ნორჩ ხეზე ასული მოხუცი მამაკაცი. შემდეგ ამ ხეს კაცები მოთხოვდნენ, მხრებზე გაიდებდნენ და ამავე სიმღერით ჯერ სასაფლაოს შემოუვლიდნენ, შემდეგ კი ეკლესიას.

2011 წ. ქართული ხალხური სიმღერის საერთაშორისო ცენტრის მიერ მარტვილში მოწყობილმა ექსპედიციამ (ნ. ლამბაშიძე, გ. სუხიაშვილი) გამოავლინა კირიალებას საინტერესო ნიმუში, რომელიც მუსიკალური თვალსაზრისით ძალიან პგავს კლეის. ასე რომ, შეიძლება დასავლეთ საქართველოს რამდენიმე კუთხეში საწნახლის, ხის მორების, მძიმე ტვირთის გადატანის, ნავის ან ბადის გამოთრევის დროს კოლექტიური შრომის პროცესის ორგანიზებისათვის განკუთვნილი ნიმუშის სახელწოდება, აგრეთვე, გურიასა და აჭარაში ნადურის დამამთავრებელი კლეის და ლაზეთში შემორჩენილი საქორწილო ჭვლებაც კირიკ კლეისონის სახეცვლილ ფორმად მივიჩნიოთ.

**ნინო კალანდაძე  
ეთნომუსიკოლოგი,  
მუსიკოლოგიის დოქტორი**

## კირჩალესა

### საშობაო (მეგრული)

ჩან. მარინა ხუცუნაიშვილმა  
ნანი ჯაიანისაგან (ჩხოროწყუ)

Musical notation for the first section of the song. It consists of three staves. The top staff is in G major, common time. The middle staff is in G major, common time. The bottom staff is in G major, common time. The lyrics are: სა-და-ვოდ კი - რა - ლეა - სა სა-და-ვოდ კი - რა - ლეა - სა სა-და-ვოდ კი - რა - ლეა - სა.

Musical notation for the second section of the song. It consists of three staves. The top staff is in G major, common time. The middle staff is in G major, common time. The bottom staff is in G major, common time. The lyrics are: 1. ჩქინ მენ - დე - ლი ხო - ში - ა - ნი, ქო - მი - ო - თი ო - ში - ა - ნი. 1. ჩქინ მენ - დე - ლი ხო - ში - ა - ნი, ქო - მი - ო - თი ო - ში - ა - ნი.

Musical notation for the third section of the song. It consists of three staves. The top staff is in G major, common time. The middle staff is in G major, common time. The bottom staff is in G major, common time. The lyrics are: სა-და-ვოდ კი - რა - ლეა - სა სა-და-ვოდ კი - რა - ლეა - სა სა-და-ვოდ კი - რა - ლეა - სა.

1. ჩქინ მენძელი ხოშიანი,  
ქომი ოთი ოშიანი.

2. ჭკიჭკიტია მეხოხუნს,  
ფსუა ქოჩა ნაფუდას.

3. შორს (ვარს) მითინდ ქორუნსუდა,  
აშო ქორჭარაფუდას.

1. მასპინძელი ეშიანი,  
გადმომიგდე ასიანი.

2. ჭიანჭველა მიხოხავს,  
ფეხები გამობმოდეს.

3. შორს (ვარში) ვინმე თუ გყავს ნასული,  
შინ დაბრუნება გლირსებოდეს.

რედაქტორი: მაკა ხარძიანი

მთარგმნელი: მაია ქაჭებაჭიშვილი

კომპ. უზრუნველყოფა:

მაკა ხარძიანი

თამაზ გაბისონია

ლევან გეშაპიძე

© თბილისის ვანო სარაჯიშვილის სახელობის სახელმწიფო კონსერვატორიის ტრადიციული  
მრავალხმიანობის კვლევის საერთაშორისო ცენტრი, 2011

eISSN 1512-228X

ბიულეტენი გამოდის წელიწადში ორჯერ, ქართულად და ინგლისურად

თბილისის ვანო სარაჯიშვილის სახელობის სახელმწიფო კონსერვატორია.

მისამართი: საქართველო, თბილისი, 0108, გრიბოედოვის ქ. №8/10.

ტელ: (+995 32) 2998953, ფაქსი: (+995 32) 2987187

ელ-ფოსტა: [polyphony@polyphony.ge](mailto:polyphony@polyphony.ge); [polyphony@conservatoire.edu.ge](mailto:polyphony@conservatoire.edu.ge);

[www.polyphony.ge](http://www.polyphony.ge)

---

ბიულეტენის შემდეგი ნომერი გამოვა 2012 წლის ივნისში